



**Eglwys y
Santes
Fair**

**y Gair
y Groes
y Gymraeg**

17^{eg} o Fai 2020

11:00yb Gwasanaeth Unedig ar-lein

Ewch i www.eglwysfair.cymru a dewiswch *Eglwys Fair ar-lein* i ymuno â ni

5:00yh Hwyrrol Weddi (ar Zoom, meddalwedd cynadledda fideo)

CROESO Croeso i Eglwys y Santes Fair!

Nid ydym yn gallu cynnal gwasanaethau cyhoeddus tan yr hydref, ond rydym yn mynd i wneud pob ymdrech i helpu ein gilydd yn ystod y misoedd nesaf.

Y Pasg 6

O Dduw ein hiachawdwr, gwaredaist ni rhag galluoedd y tywyllwch a'n dwyn i deyrnas dy Fab: caniatâ iddo ef a'n galwodd ni'n ôl i fywyd trwy ei angau, ein cyfodi i lawenydd tragwyddol trwy ei bresenoldeb parhaus ynom ni; trwy Iesu Grist dy Fab ein Harglwydd, sy'n fyw ac yn teyrnasu gyda thi a'r Ysbryd Glân, yn un Duw, yn awr ac am byth. **Amen.**

Bydd y newyddion diweddaraf ar ein gwefan, ac yn y newyddlen yma. Os ydych chi am rannu newyddion, stori, adnod, cysylltwch â ni!

Gweddï Eglwys y Santes Fair

Arglwydd Iesu, addewaist adeiladu dy eglwys. Felly, os gweli di fod yn dda, adeilada dy eglwys yn ein plith. Cymorth ni i ddyfnhau ein perthynas â thi, a chynydda'r nifer o Gristnogion newydd sy'n addoli yma trwy gydol y flwyddyn, er mwyn dy anrhydedd yn y plwyf hwn. **Amen.**

www.eglwysfair.cymru



Eglwys y Santes Fair, Aberystwyth



@eglwysfair

Newyddion Teulu'r Eglwys

Ar-lein

Am fwy o wybodaeth am beth sy'n digwydd yn ein plwyf yn ystod y cyfnod anodd yma, edrychwch ar ein gwefan a'n tudalen ar *Facebook*.

Church Suite

Mae'r plwyf wedi mabwysiadu ap arbennig ar gyfer ffôn a chyfrifiadur – *Churchsuite*. Ewch i <https://login.churchsuite.com/> am fwy o wybodaeth, neu lawrlwytho'r ap i'ch ffôn.

Cyfrannu

Mae cyfle i chi gyfrannu'n ariannol at yr eglwys trwy ein gwefan – eglwysfair.cymru.

Mae gan ein elusennau partner – *TEARFund* ac *Open Doors* apeliadau ar hyn o bryd. Yn ystod y cyfnod yma, beth am ddarganfod mwy am eu gwaith, a rhoi rhywbeth i helpu eraill. Edrychwch ar opendoorsuk.org a tearfund.org.

Hwyrrol Weddi ar y We

Cynhelir oedfa Hwyrrol Weddi Santes Fair am 5yh bob dydd Sul drwy raglen *Zoom*. Er mwyn ymuno â'r oedfa, cliciwch ar y ddolen hon: <https://zoom.us/j/5337235913> Bydd angen cyfrifiadur neu liniadur sydd â chamera a meic arno, neu gallech chi ddefnyddio ffôn clyfar neu ddyfais tabled.

Os na allwch chi ymuno ar lein, gallech chi ymuno ar y ffôn ar 013 1460 1196 yna pan ofynnir am 'meeting ID', rhaid i chi ddefnyddio'r rhif canlynol: 533 723 5913 ac yna'r hashtag. Cofiwch y bydd cost i'r alwad, a fydd yn amrywio fesul cwmni.

Yn Eglwys y Santes Fair...

rydym yn **creu cymuned** sy'n **caru'n cymdeithas** er mwyn **cyflwyno Crist**.



Actau 17: 22-31

²²Safodd Paul yng nghanol yr Areopagus, ac meddai: "Bobl Athen, yr wyf yn gweld ar bob llaw eich bod yn dra chrefyddgar. ²³Oherwydd wrth fynd o gwmpas ac edrych ar eich pethau cysegredig, cefais yn eu plith allor ac arni'n ysgrifenedig, 'I Dduw nid adwaenir'. Yr hyn, ynteu, yr ydych chi'n ei addoli heb ei adnabod, dyna'r hyn yr wyf fi'n ei gyhoeddi i chi. ²⁴Y Duw a wnaeth y byd a phopeth sydd ynddo, nid yw ef, ac yntau'n Arglwydd nef a daear, yn preswyllo mewn temlau o waith llaw. ²⁵Ni wasanaethir ef chwaith â dwylo dynol, fel pe bai arno angen rhywbeth, gan mai ef ei hun sy'n rhoi i bawb fywyd ac anadl a'r cwbl oll. ²⁶Gwnaeth ef hefyd o un dyn yr holl genhedloedd, i breswyllo ar holl wyneb y ddaear, gan osod cyfnodau penodedig a therfynau eu preswylfod. ²⁷Yr oeddent i geisio Duw, yn y gobaith y gallent rywfodd ymbalfalu amdano a'i ddarganfod; ac eto nid yw ef nepell oddi wrth yr un ohonom. ²⁸" 'Oherwydd ynddo ef yr ydym yn byw ac yn symud ac yn bod', "fel, yn wir, y dywedodd rhai o'ch beirdd chi: " 'Canys ei hiliogaeth ef hefyd ydym ni.' ²⁹"Os ydym ni, felly, yn hiliogaeth Duw, ni ddylem dybio fod y Duwdod yn debyg i aur neu arian neu faen, gwaith nadd celfyddyd a dychymyg dyn. ³⁰Yn wir, edrychodd Duw heibio i amserau anwybodaeth; ond yn awr y mae'n gorchymyn i bawb ym mhob man edifarhau, ³¹oblegid gosododd ddiwrnod pryd y bydd yn barnu'r byd mewn cyfiawnder, trwy ŵr a benododd, ac fe roes sicrwydd o hyn i bawb trwy ei atgyfodi ef oddi wrth y meirw."

Salm 66: 8-20

⁸Bendithiwch ein Duw, O bobloedd, a seiniwch ei fawl yn glywadwy. ⁹Ef a roes le i ni ymysg y byw, ac ni adawodd i'n troed lithro. ¹⁰Oherwydd buost yn ein profi, O Dduw, ac yn ein coethi fel arian. ¹¹Dygaist ni i'r rhwyd, rhoist rwymau amdanom, ¹²gadewaist i ddynion farchogaeth dros ein pennau, aethom trwy dân a dyfroedd; ond dygaist ni allan i ryddid. ¹³Dof i'th deml â phoethoffrymau, talaf i ti fy addunedau, ¹⁴a wneuthum â'm gwefusau ac a lefarodd fy ngenau pan oedd yn gyfyng arnaf. ¹⁵Aberthaf i ti basgedigion yn boethoffrymau, a hefyd hyrddod yn aroglarth; darparaf ychen a bychod geifr. ¹⁶Dewch i wrando, chi oll sy'n ofni Duw, ac adroddaf yr hyn a wnaeth Duw i mi. ¹⁷Gwaeddais arno â'm genau, ac yr oedd moliant ar fy nhafod. ¹⁸Pe bawn wedi coleddu drygioni yn fy nghalon, ni fuasai'r Arglwydd wedi gwrando; ¹⁹ond yn wir, gwrandawodd Duw, a rhoes sylw i lef fy ngweddi. ²⁰Bendigedig fyddo Duw am na throdd fy ngweddi oddi wrtho, na'i ffyddlondeb oddi wrthyf.

1 Pedr 3: 13-22

¹³Felly, pwy a wna niwed ichwi os byddwch yn selog tros ddaioni? ¹⁴Ond hyd yn oed pe digwyddai ichwi ddiodef o achos cyfiawnder, gwyn eich byd! Peidiwch â'u hofni hwy, a pheidiwch â chymryd eich tarfu, ¹⁵ond sancteiddiwch Grist yn Arglwydd yn eich calonnau. Byddwch yn barod bob amser i roi ateb i bob un fydd yn ceisio gennych gyfrif am y gobaith sydd ynoch. Ond gwnewch hynny gydag addfwynder a pharchedig ofn, ¹⁶gan gadw eich cydwybod yn lân; ac yna, lle'r ydych yn awr yn cael eich sarhau, fe godir cywilydd ar y rhai sy'n dilorni eich ymarweddiad da yng Nghrist. ¹⁷Oherwydd gwell yw diodef, os dyna ewyllys Duw, am wneud da nag am wneud drwg. ¹⁸Oherwydd diodefodd Crist yntau un waith am byth dros bechodau, y cyfiawn dros yr anghyfiawn, i'ch dwyn chi at Dduw. Er ei roi i farwolaeth o ran y cnawd, fe'i gwnaed yn fyw o ran yr ysbryd, ¹⁹ac felly yr aeth a chyhoeddi ei genadwri i'r ysbrydion yng ngharchar. ²⁰Yr oedd y rheini wedi bod yn anufudd gynt, pan oedd Duw yn ei amynedd yn dal i ddisgwyl, yn nyddiau Noa ac adeiladu'r arch. Yn yr arch fe achubwyd ychydig, sef wyth enaid, trwy ddŵr, ²¹ac y mae'r hyn sy'n cyfateb i hynny, sef bedydd, yn eich achub chi yn awr, nid fel modd i fwrw ymaith fudreddi'r cnawd, ond fel ernes o gydwybod dda tuag at Dduw, trwy atgyfodiad Iesu Grist. ²²Y mae ef, ar ôl mynd i mewn i'r nef, ar ddeheulaw Duw, a'r angylion a'r awdurdodau a'r galluoedd wedi eu darostwng iddo.

Ioan 14: 15-21

Addo'r Ysbryd

¹⁵"Os ydych yn fy ngharu i, fe gadwch fy ngorchmynion i. ¹⁶Ac fe ofynnaf finnau i'm Tad, ac fe rydd ef i chi Eiriolwr arall i fod gyda chi am byth, ¹⁷Ysbryd y Gwirionedd. Ni all y byd ei dderbyn ef, am nad yw'r byd yn ei weld nac yn ei adnabod ef; yr ydych chi yn ei adnabod, oherwydd gyda chi y mae'n aros ac ynoch chi y bydd. ¹⁸Ni adawaf chi'n amddifad; fe ddof yn ôl atoch chi. ¹⁹Ymhen ychydig amser, ni bydd y byd yn fy ngweld i ddim mwy, ond byddwch chi'n fy ngweld, fy mod yn fyw; a byw fyddwch chiwchau hefyd. ²⁰Yn y dydd hwnnw byddwch chi'n gwybod fy mod i yn fy Nhad, a'ch bod chi yn of fi, a minnau ynoch chiwchau. ²¹Pwy bynnag y mae fy ngorchmynion i ganddo, ac sy'n eu cadw hwy, yw'r un sy'n fy ngharu i. A'r un sy'n fy ngharu i, fe'i cerir gan fy Nhad, a byddaf finnau yn ei garu, ac yn f'amlygu fy hun iddo."